

**Umiarsualivimmiinnermut akileraarutit pillugit Inatsisartut inatsisaata
allanngortinneqarneranik Inatsisartut inatsisaannut siunnersuut**

pillugu

Inatsisartut Akileraartarnermut Akitsuusiisarnermullu Ataatsimiititaliaata

ISUMALIUTISSIISSUTAA

siunnersuutip aappassaaneerseqarnissaanut saqqummiunneqartoq

Inatsisartut Akileraartarnermut Akitsuusiisarnermullu Ataatsimiititaliaat
siunnersuummik suliarinninnermini ukuningga inuttaqarpoq:

Inatsisartuni ilaasortaq Simon Olsen, Siumut, siulittaasoq
Inatsisartuni ilaasortaq Godmand Rasmussen, Atassut, siulittaasup tullia
Inatsisartuni ilaasortaq Mikael Petersen, Siumut
Inatsisartuni ilaasortaq Lars Sørensen, Inuit Ataqatigiit
Inatsisartuni ilaasortaq Mads Peter Grønvald, Kattusseqatigiit

Inatsisartut Akileraartarnermut Akitsuusiisarnermullu Ataatsimiititaliaat UPA2002-
imi siullermeerinerup kingorna Umiarsualivimmiinnermut akileraarutit pillugit
Inatsisartut inatsisaata allanngortinneqarneranik Inatsisartut inatsisaannut
siunnersuut nassuiaatitai ilanngullugit misissuataarpaa:

Siunnersuutip paasinarsisinneqarnissaanut paasissutissat amerlanerusut

"Umiarsut takornarianik angallassissutit atorlugit Kalaallit Nunaanni takornarianik
angallassineq pillugu nassuiaat" UKA2001/20-ip tassalu Takornariaqarnermik
inuussutissarsiuteqarneq aamma nunami inuussutissarsiutit siuarsarneqarnissaat
pillugit Inatsisartut inatsisissaattut siunnersuutip suliarineqarnerani Inatsisartut
aalajangiineri tunngavigalugit Naalakkersuisunit suliarineqartoq ataatsimiititaliamut
nassiunneqarpoq.

Tusarniaanermiit akissutisiat

Siunnersuutip matuma ataatsimiititaliamit suliarineqarnerani atugassatut tusarniaanermiit akissutit nuutinneri ataatsimiititaliap piniarpai.

Siunnersuutip imarisaa

Siunnersuummi allannguutit pingaarnerit ataatsimiititaliap misissuataarpai tassungalu atatillugu imaattunik oqaaseqaateqassalluni.

SUmiarsuit takornarianik angallassissutit umiarsualivimmiinnermut akileraarutini akiliisarnerisa allanngortinneqarneranik siunnersuut imaqarpoq.

Ullumikkut akileraarut tonnage-mut akileraarutit aamma umiarsuarmut akileraarutit aqqitaavoq, umiarsuup umiarsualivissinnerani umiarsualiviulluunniit avataani kisarsimaffimmiinnerani akilersinneqartartoq. Ullup unnuallu aallartinneqarnerini tamani bruttotons-imut ataatsimut 0,70 kroninik umiarsuaq umiarsulivissinnermut akileraarummit akiliisarpoq. Umiarsuaq umiarsualiviup avataani kisarsimaffimmiippat akileraarut affaannanngortinneqartarpoq. Umiarsualiviup avataa 3 sumil angullugit avasitsigisoq kisarsiffittut isigineqartarpoq.

Siunnersuutip kingunerisaanik, umiarsuup umiarsualivimmut, umiarsualiviup avataani kisarsimaffissaminut imaluunniit sinerissami ilaasuminik nunnigussiffissaminut tikinnerani ilaasunut ataasiakkaanut akileraarummik inummut akileraarummik, Pax-tax-imik taagorneqartumik akiliuteqartarnissaq eqqunneqassaaq. Ilaasut nutaat umiarsuup Kalaallit Nunaata imartaani angalanerani ikisut Pax-tax-imik aamma akiliisinneqartassapput.

Umiarsuup sinerissami angalanermini umiarsualiviit amerlanerit tulaffigippagit sinerissamiluunniit angalanermini ilaasuminik niusippat akileraaruseqqittoqartassanngilaq.

Mianersortumik periuseqarnissaq aallaavigalugu, Greenland Tourism, Royal Arctic Line aamma Arctic Umiaq Line isumasioqatigalugit Pax-tax-ip 300,- kroninik annertussuseqarnissaa aalajangiunneqarpoq, taakkulu assigiimmik naliliinerat malillugu akileraarummik taama annertussusiliinerup, nunani allamiut umiarsuarsuit takornarianik angallassissutit Kalaallit Nunaat avaqqullugu angalasalernissaat imaluunniit Arctic Umiaq Line-p Kalaallit Nunaanni umiarsuaatiminik takornarissanik angallassinermi taamaatitsinissaa kingunerissanngilaa.

Pax-tax-ip eqqunneqarneratigut umiarsuarnut takornarianik angallassissutinut ilaallutik takornariat qanoq amerlatigisarnerat ilisimaneqarnerulissaaq.

Umiarsuit takornarianik angallassissutit siunnersuummi siunertarineqartut Kalaallit Nunaata aningaasaqarneranut ilapittuutaanissaat, ataatsimiititaliamit naammagisimaarlugu maluginiarneqarpoq. 1. januar 2003 aallarnerfigalugu

siunnersuutip kingunerissavaa Landskarsip ukiumoortumik 1,2 millioner kroninik iluanaaruteqarnerusalernera. Tamatumap saniatigut Arctic Umiaq Line-mik sullissinissamik isumaqatigiissut 1,8 millioner kroninik sipaaruteqarfiussaaq, umiarsuaatileqatigiimmi Namminersornerullutik Oqartussanit sullissinissamik isumaqatigiissuteqartut umiarsuaatiminnut ilaasartaatinut umiarsualivimmiinnermut akileraarutitik akiliisartussaangimmata. Tunngavissaatinneqarmammi Namminersornerullutik Oqartussat sullissinissamik isumaqatigiissummut akiliutigisartagaat umiarsuaatileqatigiiffiup umiarsualivimmiinnermut akileraarummit akiliutissaraluisa amerlaqataannik ikilineqarnissaat.

Siunnersuutikkuttaaq naatsorsuutigineqarpoq umiarsualivissinnerit amerlanerulernerisigut nunami kaaviiartitsineq annertusissasoq.

Kalaallit Nunaata imartaani umiarsuit atorlugit takornarianik angallassinissamik neqerooruteqartartut akornanni unammillernikkut naligiinnerusumik atugassaqartitaalernissaat siunnersuutikkut aamma iluaqusiivigineqassaaq, tassami umiarsuit takornarianik angallassinisutit tamarmik nunamit suminngaanneereri apeqqutaatinnagit akileraarusiiffigineqartassammata, taakkunungalu ilanngullugit umiarsuit ilaasartaatit takornarianik sinerissami angallassinissaq siunertaralugu piffissami aalajangersimasumi angallavimmik aalajangersimasumik angallas-siunnaarallartartut.

Akileraarutip allanngortinneqarnerata kiisalu Pax-tax-ip annertussusilerneqarnerata kingunerisai ukiut marluk qaangiuppata naliliivigeqqullugit Naalakkersuisut ataatsimiititaliamit qinnuigineqassapput.

Umiarsualivimmiinnermut akileraarutit pillugit Inatsisartut inatsisaata allanngortinneqarneranik Inatsisartut inatsisaannut siunnersuut taamatut iluseqarluni akuersissutigineqassasoq ataatsimiititaliap isumaqatigiittup taama oqaaseqarluni inassutigaa.

Simon Olsen, siulittaasoq

Godmand Rasmussen

Mikael Petersen

Lars Sørensen

Mads Peter Grønvold